



*Guitarista local Chris Kross:*

## “Esaki ta e aña cu mi tin cu haci audition afo”

**ORANJESTAD** – Algun luna pasa, **Bon Dia Aruba** a entrevista e guitarista local Chris Kross. Un hoben di 19 aña edad cu un pasion pa musica. Den e edicion aki e ta conta un poco di con 2014 a bay y con 2015 ta e aña grandi pa su persona.

Segun sr. Kross, esaki ta e aña

cu e tin cu bay haci audition na Merca. El a aplica pa dos scol cual ta Indiana University y South Carolina University. E ta spera cu e por cuminsa scol afo e aña aki mes. Esaki ta su deseo mas grandi. Pa locual ta trata musica den 2014, sr. Kross ta comenta cu pa su persona, tur toca tabata un experiencia nobo. El a siña con pa traha cu un publico cu ta hopi anima, con pa papia cu nan. Tambe el a explora e parti di traha cu cliente cu kier su servicio como musico. Tambe mas el a toca, mas el a siña cosnan musical nobo di detayenan chikito na toca canticanan cu e no tabata sa ta existi.

### Diferente genero

Segun sr. Kross e ta toca cu un banda cu ta toca hopi genero y esaki ta un di e cosnan mas bon cu tin. Ya cu asina e ta siña hinca diferente genero hunto y crece musicalmente.

Manera **Bon Dia Aruba** a trece dilanti prome, Por subraya cu sr. Kross “Got it



from his father”. Segun e, su tata tabata un persona hopi artistico cu ta canta, toca y actua. Desde tempo cu e tabata mucha sr. Kross ta conta cu e tabata sinta wak video musicalnan di rock cu su tata. El a wordo inspira pa e guitaristanan cu den cancionnan tabata haya oportunidad di haci nan solo. Cu 15 aña sr. Kross a cuminsa toca y e ta sigui diferente curso di musica pa sigui cultiva su talento. Actualmente e ta parti di e banda local **N Fuzion**. E banda ta den cumpli 1 aña caba y nan ta toca hopi mu-

sica Latino. E banda a presenta como acto di apertura pa hopi artista cu a bin di afo como entre otro Prince Royce, Romeo y Ashanti. Creciendo su idolonan tabata su docentenan di musica aki na Aruba. Pero tambe e tabata tin idolonan internacional. E a bisa cu e ta esencial pa artistanan hoben busca ehempel nan pa sigui. “Bo mester haci bo mesun cos, pero siña di esunnan mas grandi. Pone un vision di unda bo kier yega como musico. Y haci esey.” Sr. Kross a comenta. □

